



Sheria ya Kifalme

Hupima Tabia

Lakini mkiitimiza ile sheria ya kifalme kama ilivyoandikwa, ... mwatenda mvema.—**Yakobo 2:8.**

Kiwango kinachotumika kupima tabia ni sheria ya kifalme. Sheria ni kitambua dhambi. Kujua dhambi huja kwa njia ya sheria. Lakini mwenye dhambi daima anavutwa kwa Yesu kwa udhihirisho wa ajabu wa upendo Wake kwa kuwa alijinyenyekeza hadi kufa kifo cha aibu msalabani. Ni funzo la namna gani hili! Malaika wamejitahidi, wakitamani sana, kufahamu fumbo hili la ajabu. Ni somo ambalo linaweza kushughulisha akili ya juu zaidi ya mwanadamu, ili mwanadamu, aliyeanguka, akiwa amedanganywa na Shetani, akichukua upande wa Shetani wa hoja, aweze kubadilishwa kufanana na sura ya Mwana wa Mungu asiye na mwisho—ili kwamba mwanadamu afanane na Yeye, ili, kwa sababu ya haki ya Kristo iliyotolewa kwa mwanadamu, Mungu ampende mwanadamu, aliyeanguka lakini akiwa amekombolewa, kama vile alivyompenda Mwanawe. Isome moja kwa moja kutoka kwenye maneno yaliyo hai.

Hii ni siri ya utauwa. Picha hii ni ya thamani ya juu sana. Inapaswa kutafakariwa, kuwekwa katika kila hotuba, kutundikwa katika ukumbi wa kumbukumbu, kutamkwa kwa midomo ya binadamu, na kufuatiliwa na wanadamu ambao wameonja na kujua kwamba Bwana ni mwema. Inapaswa kuwa msingi kwa kila hubiri....

Mkristo ni aina ya juu sana ya mwanadamu kwa sababu yeye ni kama Kristo.... Anahisi udhaifu wake, anashikilia kwa kusudi la dhati na kwa imani iliyo hai katika nguvu za Mungu, na ni mshindi. Amani yake huwa kuu, furaha yake, kwa kuwa inatoka kwa Bwana, na hakuna kitu kinachokubalika zaidi machoni pa Mungu kuliko kunyenyekezwa daima kwa roho mbele Zake. Ushahidi huu ni uthibitisho usio na shaka kwamba Bwana amegusa mioyo kwa Roho Wake Mtakatifu. Ajabu zaidi kuliko miujiza ya uponyaji wa mwili ni muujiza uliotendwa ndani ya mtoto wa Mungu katika kushindana na kasoro za asili na kuzishinda. Ulimwengu wa Mungu unamtazama kwa shangwe kubwa zaidi kuliko mwonekano wowote wa nje. Tabia ya ndani inafinyangwa kulingana na Kielelezo cha Mungu....

Tukimshikilia Kristo kama chanzo chetu pekee cha nguvu, akionesha upendo Wake usio kifani katika kufanya hatia ya dhambi za wanadamu kushtakiwa kwa kuhesabiwa juu Yake na haki Yake mwenyewe kuhesabiwa kwa mwanadamu, kwa njia yoyote ile haiondoi sheria au kupunguza hadhi yake. Bali, huiweka mahali ambapo nuru sahihi inamulika na kuitukuza. Hii inafanywa tu kupitia nuru inayoakisiwa kutoka kwenye msalaba wa Kalvari. Sheria imekamiliwa na ni timilifu katika mpango mkuu wa wokovu, kadiri tu inavyooneshwa katika nuru inayong'aa kutoka kwa Mwokozi aliyesulubiwa na aliyefufuka. Hii inaweza kutambuliwa kwa namna ya kiroho tu. Inawasha ndani ya moyo wa mtazamaji imani hai, tumaini na furaha kwamba Kristo ni haki yake. Furaha hii ni kwa wale tu wanaoyapenda na kuyashika maneno ya Yesu, ambayo ni maneno ya Mungu (Manuscript 24, 1888).